


Segun un representante:

Cu tristeza famia di Mitch Henriquez a wak con e polisnan a gaña den corte



ORANJESTAD(AAN): For di Hulanda DIARIO recientemente a haya algun informacion riba e caso di Mitch Henriquez, kende na 2015 a perde su bida ora cu el a wordo deteni pa polis.

Un representante den nomber di e famia a manda informacion y ta desea pa e caso di apelacion haya atencion.

Ta asina cu apesar cu algun di e polisnan a wordo haya responsabel pa morto di Henriquez, fiscal no a pidi y huez no a duna un castigo incondicional.

Esaki ta pone cu e polisnan no mester a bay prison.

E mesun polisnan a dicidi di

apela, pa nan no wordo declara culpable pa morto di e Arubiano.

E caso aki di apelacion ta andando y awe e abogado general ta bay hasi su exigencia di castigo.

E representante di e famia a indica e siman cu a pasa tabata bastante pisa pa e famia. Riba prome di April e caso a cuminsa cu interrogacion di e polisnan.

Segun e representante di e famia, e polisnan obviamente tabata keda pega den nan mentiranan.

E mentiranan lo a cuminsa caba riba e momento cu nan a bisa cu Mitch a bira malo

den e van di polis, pasobra riba diferente grabacion por a mira cu prome cu esaki e tabata morto pa algun minuut caba.

E representante a indica tambe cu nan a gaña ora cu nan a bisa cu nan no tabata sa cu Mitch tabata pasando den mal momentonan.

Abogado Richard Korver den corte a trece dilanti tambe cu e polisnan por a salba Mitch y no a hasi esaki.

Nan a djis tire den e van di polis.

Riba 3 di April e mama y ruman muher di Henriquez a haya un chens tambe pa expresa nan mes na corte.

Naturalmente e famia ainda ta sinti e tristeza enorme cu nan tin cu perdida di nan ser keri y na a expresa esaki na corte. Awe e abogado general lo presenta su exigencia di castigo y Diamars e abogadonan di defensa lo hiba palabra.

Diarazon ambos banda por reacciona, mientas cu e polisnan lo tin e ultimo palabra.

E veredicto ta bay ta riba 19 di Juni.